

既結在前今與匈奴俱稱臣義不可距而康居驕黠訖

不肯拜使者師古曰訖竟也都護吏至其國坐之烏孫諸使下

王及貴人先飲食已乃飲啗都護吏師古曰飲音於禁反啗音徒濫反

故為無所省以夸旁國師古曰言故不省視漢使也以此度之何故

遣子入侍其欲賈市為好辭之詐也匈奴百蠻大國師古

曰於百蠻之中最大國也今事漢甚備聞康居不拜且使單于有自

下之意師古曰言單于見康居不事漢以之為高自以事漢為太卑而欲改志也宜歸其侍

子絕勿復使師古曰不通使於其國也以章漢家不通無禮之國敦

煌酒泉小郡及南道八國給使者往來人馬驢橐駝食

皆苦之師古曰言二郡八國皆以此事為困苦空罷耗所過送迎驕黠絕